

Hubilarionan a cera hunto un total di 450 aña dunando servicio na comunidad

Dr. Horacio E. Oduber Hospitaal a yama “danki” na 26 empleado

ORANJESTAD – Dos biaha pa aña Dr. Horacio E. Oduber Hospitaal ta celebra, den un bunita evento, tur e trabao duro y diligente y tur e esfuersonan di nan hubilarionan y pensionadonan.

Durante un bunita ceremonia cual a tuma luga na Radisson ballroom, miembronan di Hunta di Directiva, esta sr. Theo de Kool y

sr. Ezzard Cilié, a yama un caluroso bonbini na nan empleadonan celebrando 12.5 aña, 25 aña, 35 aña y 40 aña di servicio pa e entrega oficial di nan “pin” y pa desea tur lo miho na e coleganan cu ta bay cu pensioen.

Entre 26 persona a conta e total impresionante di 450 aña di servicio. Ta masha bunita pa mira e entusiasmo di coleganan ora yama nan dilanti pa ricibi nan “pin” di aniver-

sario. Tambe por nota e duiele den nan wowo ora cu ta gradici e coleganan cu ta bay cu pensioen, durante di un celebracion asina. Sacando un evento asina for di hospital ta un momento special, pa topa den un otro esfera compania pa nan famianan y coleganan, segun Charlene Alexander-Huntington, Manager di Departamento di Comunicacion.

E cantidad impresionante di



añanan di servicio ta un refleho di e hospital como dunado di trabao, di e esfera y cultura di e famia di hospital. Danki ta un palabra cortico, pero cu un nificacion hopi grandi, Charlene Alexander-Huntington a expresa, añadiendo cu hospital ta bisa “danki” na tur e hubilarionan y pensionadonan. Hospital ta gradici y spera di mira e empleadonan cu a celebra un aniversario pa hopi aña mas activo den nan trabao y ta bisa danki na e pensionadonan pa a haci di hospital un luga espectacular pa traha.

Director di cuida na Hospital, esta sr. Ezzard Cilié tambe a hiba palabra durante di e celebracion. Den number di Hunta di Directiva el a gradici tur e coleganan y a subraya cu un celebracion di 450 aña acumula di servicio

na hospital ta hopi diferente na e mesun cantidad di añanan di servicio na gobierno, na un hotel of un banco. Den e caso di hospital ta papia di pashent, personanan cu ta confia casi ciegamente cu nan ta haya e miho di localnan na ta merece, e miho cuida. Den caso di hospital e empleado tin hende cu ta malo ta depende riba dje pa e bira miho, e ta un posicion special y unico y ta rekeri mucho mas di nos como empleado, Cilié a bisa.

Finalizando, el a expresa tambe su admiracion special pa esunnan cu tin dos generacion di bida den servicio y a gradici tur empleado, tanto esunnan celebrando un aniversario y e pensionadonan pa nan lealtad pa cu Dr. Horacio E. Oduber Hospitaal. □

